

四庫全書

集部

欽定四庫全書

富山遺稿卷五

宋 方夔 撰

七言古詩

大水寄洪復翁

昨夜龍宮留惡客，使者借車收二麥。
溪澗洪流十丈高，不辨東阡與西陌。
高田忽變黃鵠陂，下者滙作魚龍宅。
新陳接食已缺望，夏不早耕後何獲。
似聞山縣未休戍。

旁郡豪酋遺俘馘攜挈扶老避人禍漂麥漲田遭鬼責
不知造化誰主張罪欲誰歸問河伯生平舌耕真左計
邇來硯破筆毛磔中宵耿耿坐長歎滿眼兵荒遭此厄
先生少抱調燮才蒼生不忍飢寒迫潛深請磨楯鼻墨
試草千言救荒策

宋月山以陶金戶遁山中值雪有詩次韻

金沙潭頭石鼎屨凍蟻紛紛半僵死淘江漉海撏龍鱗
領使省金蹲虎兕欲將江浙飽虛牝遮蓋誰施千丈被

先生誤墮世網中死灰更溺無遺燬攜家北走入深山
雪中高卧那能起世間得喪何足道坎止流行一彈指
忍凍孤吟寒士歌力將冰蘖戰紉綺君窮無比我更窮
濕沫難擊三千里明朝裹飯約共話炯炯方瞳巖壑裏

六月食寒梅

六月火雲聳竒觀讀書舌爛喉吻乾西湖水仙珠徑寸
使來遺我數百丸清冷冰齒嚼不碎玉池灩灩生微瀾
問仙何處得此物孤根漏暖來孤山霜嚴雪虐石學確

美人忽破冰玉顏紛紛青黃暗烟雨我獨炎暑餘酸寒
異材晚成要有待居然升置鼎竄間君不見周家老將
太公望八十封侯起釣磻

立冬前後大雷電震者數日

雲如車駁低壓城紅光閃電枉矢行老龍偷出牛蹄泓
霹靂數聲驚頑冥雨下如注翻四溟黑風吹落魚鮪腥
蚯蚓奮角蛇怒鱗穴居林處無潛形小目飛箋奏天庭
速收阿香加誅刑夜闌景霽百怪停炯炯北極環衆星

巖峯寄洪復翁

保安巖

巖峯孤尖來何雄此地金紫山為宗西行百里無去處
突起峭壁高衡嵩一支側走截水口鱗甲閃閃卧玉龍

龍來苦渴巽澗水光芒錯出千丈虹試緣石磴步巉絕

圭笏琬琰來會同

山形如圭笏

天風回聲過絕頂波濤洶洶

生寒松銀瓊玉澗斲冰雪飛雪六月聲琤琮孤撐碧落

望北極世間無此奇絕峯其下仙人昔蛻骨玉棺往往

留遺蹤

山下有復翁祖塋

昂頭欲語忽飛去時有歸鶴來遼東

住持山人子洪子枝葉遠出厓仙翁妙年歷落出塵想
幽幽桂樹生芳叢溪山佳勝屬彈壓綺語異境爭天工
心期不與俗子偶移文招我來山中劇談抵掌振林谷
妙趣脗合比鐘鏞丈夫舒卷自常事要令邱壑藏心胸
他年蓄久極必泄膚寸油雲雨太空

桐關大石

蓋天蒼蒼非虛空高懸萬象驚愚蒙仙人朝罷玉帝側
戲拖黃土留遺蹤何年墮此作砥柱千古屹立洪濤中

巨魚出沒深不測
罅縫草長蒲花茸
淙淙細浪夜春擊
水石鞞鞞鏗金鐘
我來載酒坐其上
扁舟南下編青篷
飲酣恍恍欲飛去
如踞猛虎騎遊龍
夜深酒醒山月落
一曲短笛橫秋風

赤山嶺

赤山嶺罅濶百尺
人言老龍破山出
天生異物出有時
不知何年留此跡
想龍久蟄當飛騰
怒迸脩鱗血淋漓
至今頑石尚嵌巖
朝暎光映半山赤
龍去川原秋雨足

龍歸洞穴寒雲濕我家山下龍為友欲挽銀河清八極

粵王墓

何年遺此粵王墓陳迹留傳自先故纍纍三塚厭荒山
古木寒烟暗行路憶昔祖父伯姑蘇北連齊楚陵強都
自從鴟夷載西子子孫運盡償前逋三軍散後東西走
窮無寄跡埋邱首安全發掘不可知故號至今喧衆口
邱山華屋何足言死名死利分汙尊英雄自古無葬處
誰與遺臭留乾坤

李伯時明皇按樂圖

開元天子方承平年年十月遊華清游龍爛簇五家錦
玉奴姊妹俱傾城太常舊譜看不足鬪雞舞馬渾麤俗
霓裳一闋天上來三郎自按新番曲賀老琵琶先定場
都雲擊鼓齊高張繡帽金童小垂手堂上合奏甘伊涼
蕃人大眼何曾見來筵膝前雙舞旋天顏有喜分塞酥
宮花銜出昭陽殿龍眠老手落貴家忽入老眼憑歎嗟
尚嫌却後欠二筆不寫漁陽鳴鼓搥人生歡樂如風影

自古極衰根極盛後來倘有曲江公此圖合作千秋鏡

明妃曲

明妃去時載橐駝金環珠絡紅錦靴燕支山北萬蹄馬
半夜劍槊鏘橫磨呼韓鬚鼻極殊狀黃羊乳酪氈裘帳
此生賦分逐飛走一回坐起一惆悵當初自恃顏如花
不嫁比鄰來天家掖庭咫尺隔萬里十年不復逢宮車
畫工不信能相誤一朝流落天涯去漢使年年去復來
長安不見低烟霧寒沙擊面雁飛秋手抱琵琶淚暗流

上絃冷冷寫妾苦下絃切切寫漢羞妾身生死何須道
漢人嫁我結和好曲終誰是知音人斷魂去作墳頭草

太湖石獅子筆架

憶昔金仙去後遺雙狻化作雙玉南海邊洞庭山鬼逐
不得夜吼雲根今幾年先生曾作橘洲客屢撼梧桐怖
龍伯攜歸深山動光彩黑軀縮爪羆藏迹爛爛眼有百
步威安眠不動鎮書帷自慙四座無長物煩護老穎書
中闕醉墨淋漓日千幅毫端猶帶湖光綠憐渠駿猛助

奇怪他日相從校天祿

九里路

去年九里路烏攫人腸挂枯樹今年九里溪沙頭白骨
高復低人生變滅如泥土死後猶傳姜萬戶翠眉粉頰
誰家兒夜赴軍前效首虜將軍多愛恩意疎分將吳口
充包直慙懃道與送行使前日朝官多有書

唐人攻藩
鎮中朝官

多以書託主將
求沒官妻妾

七夕織女哥

牛郎咫尺隔天河鵲橋散後離恨多今夕不知復何夕
遙看新月橫金波拋梭擲絀愁零亂彩鳳飄飄度霄漢
重來指點昔游處香奩寶篋蟲絲滿一年一度承君顏
相別相逢比夢間舊愁未了新愁起已見紅日銜青山
當初謾道仙家別日遠月長不見接不似人間夫與妻
百歲光陰長會合

文書再報六月朔日食

憶昔雨洗冬甲子春來飛雪徧千里老農雪識古相傳

一番春雪一番水今年麥熟雲成堆并刀收斂疑寇來
自從入梅不見雨田間熱氣飛黃埃清臺奏下郵傳急
月蝕九分日蝕七昨宵槌鼓鬧如雷素娥憑怒面漆黑
太陽室家怒相齧東西不肯還宮闕天公不肯目偏盲
又傳日蝕林鍾月一筵夜拜東皇公休作怪變驚兒童
願分陰陽作平等五日一雨十日風

續憎蒼蠅

炎官煽毒日色頰四海鼎沸遭焚蒸吳牛耕罷汗且喘

暫休樹影眠溝塋不知蒼蠅名品夥乘時附勢相欺陵
其間一種號赤目巧窺猛攫如飢鷹鑽眸嗜鼻不可奈
以首溷水澆清澄自期擺脫有此計須臾撲緣如牽繩
牧兒旁坐少助力搥以指掌麾以肱更憑草帚時一掃
墜地死者堆斗升乾坤蕩蕩產萬類涵淹惡物吁可憎
間從林下看水牯作詩為續憎蒼蠅

寄題沃祥卿梅泉二大字蓋何潛齋筆也

錢塘數首梅花聯羅浮三疊梅花篇世間妙語久絕響

誰能高步凌飛仙窮冬天氣寒刻栗草木槁死冰頑堅
孤根漏暖得春早水流石竇聲濺濺美人拭面照古鏡
沈吟不去愁嬋娟下有山人學冷淡入夜忍凍僵護肩
臨流赤脚踏白石手按紅蕖餐雲烟長哦新句詩清苦
口吻噤痺棲飢鳶近聞梅花詩祖出水部久遣詩孫參
洞天許分一派伴岑寂毫端紫氣衝魁躔我来嗽香嚙
清冷欲說妙偈夢未圓澹然人我了無語但見花稍明
月墮寒泉

人有叢菊見遺而花半分黃白者

有來遺我異色菊一叢深淺分白黃變窰燒成古壘洗
怪石錯出真琳琅我疑造物有間氣紛紛醜好都難量
不然司花出新巧分枝接葉為作半面粧書生生活澹
無味笑指枯硯收禾桑偶逢好事慰寂寞日與相對揮
清觴自憐今世少有趙昌徐熙水墨筆誰寫諸相爭毫
芒惟有詩人具真畫翛然心地超羲皇

次韻吳友直和潘樂閒見寄韻時潘客華亭瞿氏

之門

文章蟠窟蛟蛇黑精神緊峭冰玉白置君承明天祿中
富貴不待相促迫學參諸老居二四氣凜羣兒壓千百
生平不主疽與環沉復侯封羨賁赫蹉跎無便凌風雲
歸伴凡魚東海窄袖餘閩越竒傑氣掩藏光怪恣窺摘
如今老境謝紛華斥去浮花收粟麥我來兩見鳴春禽
低向藿間飛拍拍有時乘興騁詩俊稗說譚言都不擇
魚還非子子非我肝膽相忘總無隔苦無分遇食太倉

近犬驚人屢遭責一身何必要贏餘我為鼠謀從下策
用子聲韻謝吳友直惠蠟箋

千年老穀無人知萬杵椎冰身汗熱木膚解剝白於綿
凍手龜皴腕將折荊州魚網蘭亭覩彼美不曾傳祕訣
獨留此木在人間禿盡青山散妖血邇來竒製蠟作紋
草木蟲魚生眼纈只今吳越稱第一秋浦浣花派滕薛
先生好古得此物揮手行與時流別紫薇花前草尺一
書成氣凜寒松雪不然名山撰古史蛟龍鬱屈蟠奩篋

有時浮戲寫詩章
颯颯落錐蠶食葉
比來分遣二十輩
西江遠借餘波
浥聊憑和詩報瓊瑤
袖手愧逢強對怯

表甥何雲嶠舍館而語游於其行贈之以詩

善武侯數

書生事業窘一門
窮年獨處三家村
蟾蜍爬沙鞭不走
無力號叫排天閻
曩聞將軍狂可撼
往舍窠臼窺其藩
譎言稗說不暇擇
談笑抵當如優髡
諸公義財澁且薄
頗樂軟熟憎囂煩
今君窮餓坐百巧
安肯挾冊媒朝昏
試探囊中祕花術
勇決不待中宵奔
吾聞武侯暗得司

馬法平沙散布風雲屯多時竒傑了不悟後來知者靖
與溫子今持此說性命禍福出口如瀾翻文章不作杯
水直不如薄藝隨我兩脚跟滔滔世駕不可挽行矣與
汝傾離尊

和東坡惠州梅花三疊

其一

子真換骨三家村青帝東臯來醉魂夜深更遣明月洗
瘴氛吹散南海昏仙宮么鳳挽不住自要寂寞留故園

便教凍餓死亦足冷面不作雞肉溫烟痕半空照寒水
露臉猶泣迎晨暎游蜂底處得消息不計春色闕重門
先生對花韻清苦短偈袞袞翻千言花神嗔我太漏泄
罰以太白傾殘樽

其二

萬松崩上三家村林下美人現香魂淡粧素服謝凋飾
擺落玉鏡塵埃昏散花衣裊粘不落昨夜偶過祇樹園
樹下泠泠漱澗玉亂流赤脚飛泉溫噴成澗草萬片玉

陰崖未肯希春暎自憐艷質媚幽獨拄杖敲鐺誰過門
相期但有月知狀不用椽筆書要言花應一笑飲我語
隨風飛墜雙銀樽

其三

白鶴峯頭荔子村誰喚東坡半死魂作詩惱花太愁絕
雲月黯黯天昏昏欲教綺語洗蠻瘴不使冠服棲邱園
海山淮水隔萬里十年契闊陳寒溫老仙不食烟火味
曉隨鴉餐暘谷瞰此花亦解慰流落如在玉堂西掖門

自從三疊振絕響澹然相對俱忘言
我來戲譜不調曲
時有問字爭芳樽

豆瘡歎

西家真王化作灰東家穉松雪霜摧
人生有命惟脆薄
逝水一去何時回試看昨日繞牀戲
或騎青竹折早梅
須臾變滅不可恃惟見松下雙土堆
嗟哉玄冥弄權柄
掀簸炎瘴飛氛埃天公不肯憐赤子
坐使瘡痍愁嬰孩
斷魂零落向何處溪頭望哭思歸來
誰能便作忘情者

作詩往助風泉哀

次韻王介山別齋職

葛溪練練鋪瓊氎仙人燒丹幾何年庠老三年住仙窟
歸騎踟躕鞭不前當今越雪竟誰是危坐臯比紛不恥
區區升斗老英雄得失何殊釣溫水惟君挾策從東來
家傳瓢履師顏回後來終竟祠石室此去應難隱釣臺
青山笑我逢遲暮怪竒文字無人覩誰麾清夢落東安
疎頑尚費推擠去悠悠雲水文情中荊州篠簜慙中空

瑋然餘韻逐飛鞚詩老箭鋒那可衝男兒事業人人有
氣概相期向杯酒他年擁節過子陵莫道故交翻覆手

代雲岫送王介山

功名零落如破甑羲娥不住隨流年問君發跡縣博士
幾時得到龍旂前我今老去覺今是回首當年空自恥
妄心不起百事冷已作古井無波水看君富貴疊疊來
雲路何須取勢回忽然結束行萬里首冠步搖趨天臺
相思望望碧雲暮少微光芒紛下覩應憶秋江老故人

瑤音定寄雲鴻去我時堦砌蘭玉中襪襪六翮搏秋空
與君追逐赤霄上寶劍騰空不可衝兩眼昏花惟我有
早梅樹下離亭酒呼童草寫送行詩不是當今無價手

代履道送王介山

寒廳零落分半氈雪霜刻粟年復年書生事業澹無味
賴有夫子坐我前世間好惡紛非是蠻觸相挺人不恥
嗟君嗜好與世殊推波獨障百川水君今何去昔
何來江南欲掉扁舟回相思此去杳如夢日斜獨

上高高臺富貴來時未為暮道旁愚婦從渠覩我亦來
乘下澤車看君萬里翱翔去雲萍聚散渺莽中講席人
驚冀北空少陵時作湖山主傳草堂
時謁告一面誰當孔道衝
相看一醉無何有笑指春江作春酒丈夫何事兒女態
明日長亭一揮手

次韻洪復翁辭沃氏招館

可憐傾城無蹇修睥睨欲媿王與侯年華荏苒春復秋
夜彈古詞韻三州紛紛箏篳沸啁啾忽爾雅操聲俱收

我亦少小獵九邱掩鼻利達視若猶秣厲欲洗平生羞
羲娥鞭後逝莫留誰麾衰暮出巖幽丁丁斤斧愁林搜
苞裏破硯開荒疇詩卷千束喘兩牛隘視宇宙前無儔
賴有夫子紛應酬冷然獨繭繅長抽調言不作詩帳囚
旁人指我作書郵雙雙紫芒炯中洲談笑不下孫叔優
交情雲水空悠悠肯為腐鼠瞥下鞫湖海何處無俊游
對面不識非我謀醉呼梅花居上頭高寒不落第二流
我亦倒囊出飢猴雪中雙屨追清游

借王介山韻送子聲小學教諭

小兒心孔暗不開紛紛誰是驛駟材徐生善頌有名父
文旆新向儒宮來雁行趨立誰家子捧書驚看眉間喜
我亦歸謀二頃田送老西河從此始

五七言長短句

無愁潭

酌我無愁酒歌我無愁詩竭來無愁潭上弄明月漱滌
萬慮清肝脾平生蓄積總開豁便欲遺世超希夷持盃

試問此潭水昔來何處今何之覆船山高寒及葉玉泉
飛下東天池分流一瀉數百里直抵絕壑渚清漪鏡平
百丈洞無底其下深黑蟠蛟螭幽蘭薜芷亂洲渚倒影
寒浸枯松枝千回萬折流到海波濤噴薄孤城危潮生
水滿潮退涸蓬萊清淺條改移此愁與水兩無盡昔人
已去今人悲君不見莫愁山下春水長畫船鼉鼓相追
隨淡烟芳草望不斷石城荒廢留空陂不如此潭只在
山水窟縱有奇勝無人知何曾紅粉照清泚但有欸乃

漁翁詞一聲歌斷暮山碧秋風雨鬢寒颼颼

大雪

一日雪空裏浮花生眼纈二日雪竹松委地枯楠折三日雪獸駭禽奔蹄跡滅四日雪翁嫗啼飢淚成血天生萬物忍棄捐似為多情幻竒絕由來恩怨不相關無情有情總磨折君不見堯時洪流浸十日赤子喁喁化魚鼈湯時亢旱烘七年山河大地紅爐熱當時賢聖救不得坐待時來自休歇蓋天垂地憂長人浪教寒士頭先

白玉皇高居耳目遠鬼神虎豹爭羅列
瑱冥滕屏罪當誅劈牋試與東風說

次邵卓翁韻奉寄族祖竹巖令孫九歲通念六經
君不見李唐秘府堆故紙韓老作詩諱校理若此當時
九歲童苞裹寶玉漸血指吾宗魁橐百世傳近騎箕尾
凌蒼烟再生雛鳳墮君砌次第聲名期拍肩願渠養氣
休吟誦六翮襪鳳質竦倚桐傾枝真有待羽儀留作
清時用我今老去不作文閉精嘿坐學養神蕭然衰白

不復漆猶喜兒輩奔秦軍間扣商謳詡人瑞筆陣縱橫
人不畏歸看英物定何如山西老將空羞愧

富山遺稿卷五

欽定四庫全書

富山遺稿卷六

宋 方夔 撰

五言律詩

夜坐

竹翠濃如滴，絺涼薄似空。
遐觀山缺處，露坐月明中。
計較圓碁勝，喧呼琢句工。
畏途誰觸熱，衣袂漲塵紅。

宿赤山嶺

杖屨過山東一重高一重雲烟呈晚色雨露洗秋容
蹇石伏虎連蜷木寓龍夜深橫短笛獨宿最高峯

雨雪交作

雪晴那復雨雨雪苦纏綿連月無行地窮冬不見天
穴居狸舐掌水宿鷺聯拳更道深山裏翁飢歇午烟

吾生

行年四十九忽忽笑浮生客少真成懶兒多半學耕閒
身窮縛急壯志老圖成自號知非子悠然仕止情

春晚憶弟

自歎形容改空驚歲月更點蠶附繭死怨鳥寄巢生
歎歲愁親故貧家分弟兄江南芳草地此別若爲情

秋夜

露白初濡木星虛漸集房蛾飛爭墮水魚退急投梁
搗練隄防冷収禾準備荒只愁棗紅地萬馬逐殘羌

冬日

冬晴不作雪無處聽寒號山外一輪起霧中三丈高
曝

金史四庫全書 卷六
肩樵解褐曬翼鳥遺毛不特寒梅早牆陰發露桃

早行

早行理歸裝殘燈耿曙光開門半山月立馬一庭霜鐘
響知雲寺波聲認石梁脩途留不住去去出山莊

山行

此以下東安所作

幽懷浩難寫倚徙一枝藤春蔓雲根草寒流石罅冰
山行千萬轉茶話兩三僧亭下尋歸渡漁舟喚不磨

晚坐二首

羲娥相逐走歲月不饒人露重棲翰倦月明歸夢頻還
家如過客落地即成親世路秋風早悠悠多賤貧

又

巖風入疎竹紅影颭窻扉遠地猶爲客寒閨未寄衣絲
蟲墮復上旅雁去還歸寄語水曹喬相期老翠微

謂存耕也

與吾
同庚

雜興

旅雁南猶北絲蟲墮復粘流年忙裏過衰髮暗中添記

金史四八
卷六
事推銀管尋題探玉籤
區區淡生活與世異酸甜

游涿渚

朝遊伍胥渡暮投杜主祠
綠蕪高犢背紅雨瘦花枝
夾道鳴腰鼓輕舟馳彩旗
蹇驢寒服客未許看腰肢

曉行二首

百年長擾擾無地寄浮蹤
客醉傷春酒人行送曙鐘
烟霏啼謝豹星斗壓盧龍
笑共孤雲往歸投江上峯

又

百折飄香路千攢疊翠鄉斷橋人蹬蘚低樹女剝桑泊
店風烟靜問途山水長新歸愁復去佇立轉蒼茫

秋興四首

坐卧足清幽何須定遠侯一簷霜竹月四壁夜蟲秋酒
不推辭醉詩能斷送愁可憐江令老萬里返南州

其二

西窻幽絕處懶與老相便燕伴遲歸客潮推送上船照
杯窺戶月注硯養花泉近藁無新語歸來學釣鱖

其三

孤跡寄滄洲浮雲無去留
大山招楚些小海傍吳謳
相值誰非我欲歸春復秋
西風葛溪路衣袖晚颼颼

其四

故里千山遠荒城八月寒
霜裊餘鳥啄社雨洗魚殘
紫塞跑風鬣青冥縱露翰
微生獨不化羈紲老江干

秋晚雜興十二首

其一

深秋轉蕭索木葉滿荒城逝水流年景西風逆旅情圍
監通馬語籠養變禽鳴吾道知哀久人都一概聲

其二

烏柏數家村漁樵自作鄰舊墳前日發富室近來貧古
道狐成怪深山鬼作人茫茫塵世事無處問蒼旻

其三

天涯誰道遠嶺海接并幽馬帶交河種人穿真臘裘梅
花南國夢首偕故宮秋安得方仙道飄飄訪十洲

其四

月去極百度天行水四旁渥洼駒汗血婆綠宇旁行朔
雨夏猶雪南苞冬未霜地中在何處無便向嵩邱

其五

門前吳越路幾步隔紅塵學課九千字年書十二神殷
牀馳道馬隔岸渡橋人自愧樊籠裏飛騰未有因

其六

地占繁雄郡人奔財賦疆北僧泥佛相南客賈胡裝打

穀拳毛馬彈箏跼躑娼西風愁世路無路立蒼茫

其七

青溪溪上路書劍此棲遲涼月穿衣褐寒波照鬢絲古
桐傳賀若橫玉犯龜茲不為傷秋老孤吟自可悲

其八

誰作百年客聊隨三宿僧詩皆傳妙品禪未悟中乘曉
枕空鳴角秋窻夜剔燈欣欣會心處走墨剡溪藤

其九

蟲壁話秋闌西齋日已寒塔鳴辭故葉水擊跼飛翰路
接千峯榭潮通百丈灘葛仙無處覓我欲問燒丹

其十

夜魄湛精氣冰魂消瘴氛寒洲沙印篆荒樹葉鏤文詞
度柳三變書臨顧八分誰憑當道勢擡舉上青雲

其十一

蕭索已秋色空濛欲暮天平蕪荒樹外疎柳斷橋邊山
暝殘雲合波停碎月圓眼前森萬境忽忽暗彫年

其十二

客來銀水北叩我老生涯裘褐多捫蝨田蕪半種瓜
文章動窮髮碑板過流沙終竟成何事逢人莫浪誇

世之詠物者採春花而落秋實余欲矯其失作冬
果十詠

橘橙吾臭味豈特是情親三寸燕南異一雙甌水珍
色包金錯晚香擘玉纖春無復承平事天恩徧貴臣

右柑

果綠景初好花開日正寒
嚼香流玉瀼分熟剪金丸
淮枳標殊性甌柑並二難
無人徵包貢蓬殿淚闌干

右橘

人皆遺外像爾獨取皮毛
露顆團黃玉春枝剪綠袍
搗蘘燒雨韭飛縷薦霜螯
南橘應同派誰云僕命騷

右橙

翠橙春後可食肉

自是雪香骨風霜閱四時
紙包防蠶尾泉浸浴瓊肌
不作離愁芥能爲潤肺醫
看渠津潤處詩就已涎垂

右梨

秦燕千樹地富貴出山莊外作蝟毛磔中含雞子黃懸
枝開霽日芽綠候春陽每憶和兒炒如今去故鄉

右栗

共祖青龍寺分支金谷湄擣生澄水漆摘熟剥霜皮半
啄餘秋鳥羣偷縛夜狸長脚消病久清冷慰詩脾

右棗

萬株名古寺近復說東陽翠樹駢頰卵燒空炯夜光果

堪涼渴朔葉復草顛張欲上潼江去尋思石蜜霜

右柿

有木出蠻鄉生居萬仞岡凌烟圖朽質中水濯青裳細
剥瓊肌瑩香浮瑀俎光尸蟲穴何處食果得奇方

右榧

辛苦學淘河尋根不仗柯千虬蟠下土尺玉浸清波自
笑抽絲亂從渠鑿竅多誰分冰片片一醉洗沉疴

右藕

種自塗林得名隨博望來半因霜虐重多爲雨淫開粒
破冰生骨房分珠帶胎玉匙飛一餉爲我配金壘

石榴

別徐雪岡

春曉杏花路逢梅憶故知一年離別恨幾度唱酬詩風
雪愁歸路關山隔後期欲言難即見臨水寄相思

別子聲諸友

祇有去日數悠悠歲月除再三來使語千萬故人書老

况難爲別親情暫以疎往來愁道路吾道竟何如

夜坐

風葉夜蕭騷寒燈照寂寥冷泉和月汲殘葉帶霜燒半
白吟髭茁餘紅醉臉潮舊來樵牧地小隱不須招

山居二首

幽人在何處東庵是吾家小澗石楠樹疎籬木槿花林
深啼蜀鳥水滑搗胡麻五字山居偈長吟老歲華

又

柴扉終日掩一室靜無塵
久坐已穿塌高眠不禿巾
詩腸愁境樂酒面老年春
自有白雲隔無勞塵俗人

早行臨安道中

早行高坎市遺構草新青
敗壁蝸留篆空棺狐讀經
落落

花新舊恨別酒短長亭
惟有松林下寒梅尚獨醒
駱氏今家

於松林之故巷

燈下書懷二首

浮生幾半百况復值秋闈
瘦地年年早貧家種種難
兒

金匱石室
卷六
因廢學懶妻爲典衣寒吾意憐文墨時時展卷看

又

青雲謝足下流水暗門闌生計作詩苦客愁行路難老
慙鞍馬晚窮笑硯蟾寒歲暮餘松菊留人仔細看

五言排律

過崇山徐墳欲招通甫不果晚憇景德觀以歸寄
通甫

送春過崇峯假步自登眺行田走詰屈攀磴上窸窣岡

巖聳四圍崖壁儼雙峭野芳躑躅紅林宿離黃叫感彼
松下人脫甚風中燎精靈散埃氛骨肉蔽竅竅晝眠嗥
狐狂夜照飛熠燿朗悟豁餘悲清響發長嘯思君客沃
洲對面隔蓬嶠扣門乏因緣更僕煩請召流落俱異鄉
節奏本同調風高鷁退飛月落牛反噍夷猶憇仙宮酬
答領道要幽尋屋種梅雜坐逕披蓑棋枰夜半局丹竈
晝殘燒心期迴獨詣世誘浩難掉詩興逼行雲樹色留
晚照拾翠記前遊舉白倒餘醕桐尾隱寶匣龍文掩魚

金華集卷六
卷六
鞘何日聯華鑣闕亂漁釣

遠遊四十韻

介士苦拘檢策士妙籌度俠窟養聲譽宦海高階爵紛
然殊門戶何能脫韁索自憐心期遠雅與俗物薄潛光
瑩璆璧幽芬結離葯濯濯出山泉亭亭橫空鶚挾策誤
中眉投耒悲失脚文圍嚴鞞鞅詩戰淬鉞鏑梯颺轉南
溟銘山蕩朔漠君門虎豹嚴天路鬼神惡高唱不遜和
貴售屢遭却龍移厓垠崩鼇掉海湖涸運流數遷謝時

改異今昨乃翁安事書此輩宜疎濶三年屠蛟蚪無用
閑猛斫百金買砂青不售虛奇藥日月雙飛奔身世兩
寂寞夜雨暗燈火秋月冷籬落不甘軟弱吞坐受飢窮
縛萬里落半途全局差一着逝將故人心共赴青雲約
東遊畧蓬壺南望趨衡霍鼎中珠還返腰下寶踴躍朝
真玉皇頷問道金仙諾青邱啓玄命白虎司祕鑰朱實
足我糧靈液共我酌騰我上界仙差勝生民樂危登望
沙界橫潰煎鼎鑊氈毳宅吳楚戈鋌血川洛冠纓望豺

狼羅綺逐猱獲枯根痛艾薙弱肉生啖嚼離離盡邱墳
莽莽空城郭悲來愴長懷悟去念遐託相期離塵垢有
便上寥廓跡霄漢隔動步窮途錯機關暗施張爪距
猛挐攫盆瓶喧蟻蠓旦暮算渠畧紛紛自起滅泛泛無
棲泊雲烟渺空山浪濤赴舊壑他日欲相知姓名寄歸

鶴

富山遺稿卷六

欽定四庫全書

富山遺稿卷七

宋 方夔 撰

七言律詩

雜興

世奕奔趨若決河誰將獨力障頽波
指衣太守存唐苦
循髮將軍負漢多
薜芷不芳甘自變
白圭有玷尚堪磨
是非勿與時人說
爲就重華述九歌

閔忠 美文天祥

弱冠知名動紫宸
兩朝際遇荷恩深
身先赴義人爭死
天不成功淚滿襟
自鄭有謀歸華氏
舍湘無地托王琳
鞠躬待死無餘事
不負朝廷不負心

誅姦 刺賈似道

握兵結眷冕旒前
牢落英雄二十年
虎殿壽觴人痛哭
鵝堂私語衆喧傳
爾身不恤無埋地
此恥奚容共戴天
不有四明倡清議
至今蛟虎卧山淵

盧明之開壚

懶作西風汗漫遊，歸謀諸婦此淹留。
采花墩近初成酒，種秫田多早帶秋。
燕頰已空西塞夢，犢視莫遣遠山愁。
滄江留得偏醒客，袖手時凭百尺樓。

宋震翁以詩見推次韻爲謝

脩竹猗猗月半間，此生贏得占清閒。
磨鉛勘易未三絕，吐火燒丹欲九還。
騎鶴腰纏空入夢，跨牛髀骨慣行山。
秋來閒把詩消遣，敢向騷壇占絕班。

雜興

其一

種竹千竿密復疎
菴猗深處着蝸廬
有牀自可安周易
無飯誰教典漢書
疊嶂畫屏圍紫紫
飛泉白練落階除
絕無半點功名望
一任浮雲自卷舒

其二

不露文章世不驚
由來天亦厭虛名
弦歌夫子窮將聖
風雅靈均死獨清
其道卷懷何足恨
斯文得與豈無情

長歌獨坐滄浪水休說他年起濯纓

其三

青山相對總儀刑人世浮華隔幾塵厚味不知松韭薄
舊衙那似菊松新銀鬢豹血爭劉項翠釜駝峯死號秦
大抵危機隨富貴不曾粘着退閒人

其四

霜風獵獵響林坳獨有寒梅漸作包倒影水涵窺沼樹
淺痕月印上窻梢綠衣低掛酒初熟烏帽斜欹門屢敲

花得初陽人得復俱從顏子結窮交

其五

天地生生不盡仁惟梅先得一年春花神銓次初編譜
月老莊嚴妙寫真索笑暗添風度爽嚼香清洗肺肝塵
莫嫌刪後無題品自二南來有幾人

予家世富山久矣世有隱德老坡所謂我家韋布
三百年惟有陰功不知數蓋類是也因作此以記
其實且以勉族氏子弟云

自有乾坤有此山嘉名久矣落人間吐吞雲霧景千變
森秀松栢翠四環肯並貴溪爭顯達應同愚谷耐堅頑
山人儘得清吟趣芳杜香蓀不厚顏

又

家住青溪東復東林霏嵐影暗葱龍山排闥入蹲蒼虎
水抱邨流卧玉龍田畫井疆前後隴岡橫乾艮兩三重
客來若問誅茅地落日雲飛第一峯

又

我家韋布久嬋媯積善工夫遠有源東漢賢良來鼻祖

晚唐文獻到聞孫

家有唐禧昭間文字

世增忠厚成風俗人尚耕

桑務本根贖喜邇來多識字粗書甲子記新元

靜樂先生祠堂

五季橫流欲障天先生雅志寄林泉嘯吟獨抱濟時畧
高尚甘為遜世賢奕葉簪纓他有耀微時未耜我相傳
何年得見歸來鶴暫假風翰遂老仙

梅

玉妃破白入春宮萬紫千紅立下風老樹冰霜皴剝後
寒枝烟水有無中月橫山館笛初起人立溪橋馬欲東
為寄故人無信息更憑健筆入詩筒

雜興

南枝憔悴北枝榮轉眼浮華跡已陳昨夢已空巫峽雨
昔遊曾記武陵春浮生一日復一日世事後人哀後人
兩鬢欲霜行脚倦悠悠無計謝風塵

大卿先生惠藥方

淺謀不遂少年狂吐吐催人鬢髮蒼深雪寒添詩興爽
早梅清徹夢魂香已諳林壑投閒趣且試神仙却老方
聞說丹爐留近處羸糧我欲問金堂

田園雜興

半生燈火誤牛衣晚歲纔能悟昨非雨笠半畝將犢去
絲車細捲趁蛾飛粟生燒地山宜老草爛新畬水正肥
莫道勞生何日息邁來是事喜忘機

觀物

彭殤顏跖不相齊
秋悴春榮各有時
共種花分紅白色
同根木有死生枝
悲欣自是人情異
賦子寧非造物私
却笑莊生未諳此
安排齊物費言辭

木犀花

其一

此花習氣愛巉巖
不受紅塵點碧衫
地挹鷲峯移境界
天教蟾窟墮塵凡
瑤林撼撼敲殘玉
金屑霏霏貯滿函
月影徘徊花影亂
待攜雙屐與君銜

其二

招隱誰招到碧巖自嫌黃綬映青衫
月光童子分根柢金粟如來混聖凡
勝賞莫辭空百盞麗酬不記達千函
竦身便脫塵埃去徑上清虛謝轡銜

其三

秋風吹夢遠千巖偷看天宮雲錦衫
色尚紅黃定崔李花從開謝識荆凡
試教月老排芳譜更聽仙童誦玉函
賸有辟寒金粟樹丁寧棲鳥莫教銜

其四

曾住仙山九折巖
夜涼蘿荔掛衣衫
月窺樽裏如相伴
人立花邊自不凡
叢綠聯環瑤玉佩
殘黃鎖骨現金函
枝空蟾窟今誰記
猶道東陵繫舊銜

耜巖連和六首予與汪子新亦各再和二首

夜隨涼氣坐秋巖
醉墨淋漓亂點衫
花裏固知仙種別
詩中肯道使君凡
乘風徑欲眠香窟
修月曾經發寶函
收拾萬金歸賈橐
不須麟閣大書銜

又

風韻孤高百尺巖
敝袍爭得似荷衫
久知邵氏聲名遠
自愧賓王骨相凡
閒搗香涎供玉杵
戲題綵帖拂塵函
醉來爲問姮娥信
更倩魚傳與雁銜

秋晚雜興

白藕花殘暑氣收
憑高更欲上層樓
蒹葭新瀝水天晚
禾黍高低風雨秋
雞甕豕零更佐使
狗屠狐叫或王侯
世間萬事祇如許
莫把閒愁枉白頭

以書院課治事留杭十日竟爲小吏所阻

倦看世態變涼炎老覺詩書味更嚴與世不諧多枘鑿
謀生甚拙欠齏鹽搏風肯羨鷓鴣化署紙偏憎雁鶩拈
從使小兒輕我輩只今歸去問陶潛

舟泊松江

尊江幾度酌張翰屈指今纔二十年昔日米囊羞破釜
暮年詩卷壓歸船飛飛燕子依風席漠漠楊花點客氈
草遠烟濃迷處所鄉心飛去白雲邊

過錢塘舊京

曾逐東風過曲江
人間俯仰隔興亡
江頭潮涸趨漁浦
山下城空失鳳凰
漠漠黃埃昏草棘
悠悠陳迹閱星霜
由來離黍遊糜地
不分鈴鳴替戾岡

再點陶金戶計

萬里雲程阻便風
孤鴻痛定再傷弓
徵求多出儒冠外
飛走難逃世網中
不分事情多倚仗
厭看人面訴貧窮
生平豪氣難磨折
時向毫端吐白虹

清明二首

漢世諸陵已古邱，悲風撼撼老梧楸。
金人往日淚曾墮，石馬何時汗忽流。
江北江南千里隔，身前身後百年愁。
九原定有英靈在，消得寒儒浪白頭。

又

一去昭陽入朔臺，羈魂流落不歸來。
葬從胡地留妃骨，死向南方颺后灰。
鴉噪莫看耘墓迹，酒香誰把洒陵杯。
茫茫草地人稀到，風急棠梨落又開。

次韻洪復翁食蕨

花葉根莖種種香誰知山草宿春糧筠籃淨洗傾銀粉
瓦釜狂搜凍蔗漿爽口如蕪三鼎味療飢不試五倉方
西山餓死真餘事安有冥鴻為稻粱

別弟

欲去相看手重攜寒波芳草助淒迷無人傳業空多子
有弟持家老得妻風雨燈前頻入夢詩文酒後共分題
孤飛不羨冥鴻舉只羨南歸羽翼低

雜興十首

其一

前程在處暗危機
脫跡紅塵入翠微
清水一竿張釣具
白雲四壁掛樵衣
馬惟畫骨空嗟瘦
龍不點睛那解飛
差有陳編相伴住
時將詩句洗前非

其二

老去蹉跎萬事休
襟期甚不入時流
倦飛已作歸林鳥
懶起猶如落草牛
一點眉黃無宦况
五分頭白爲詩愁

玉人期我滄洲上未擬他年賦遠遊

其三

已更門戶自持鉏謝絕交遊與世疎
處變卿還用卿法
養高吾自愛吾廬屏張前世無聲畫
架插今生未見書
水北山人偏解意求分半席間樵漁

其四

冷落門牆絕似冰夜窻風雨耿孤燈
采盆任我翻成雉
澆墨從渠點作蠅休說文章祇小技
由來富貴總無能

依稀楊李無人憶但憶灤西杜少陵

其五

紫綬緋裳印佩金我於數子總無情
傍人門戶傳書客投老田園識字氓
世變委懷無逆順事機到手即功名
子房收斂英雄迹誰說神仙在穀城

其六

人境無緣斷俗喧丁寧牢閉兩柴門
五更孤枕客懷惡半世青燈書眼昏
有日空爲無日計醉時還道醒時言

白雲久有南山夢不待他年畢嫁婚

其七

駸駸鏡裏鬢霜侵偶占溪東十畝陰風雨四時無盡藏
松篁終夜有餘馨家藏爲米難餬口日課除詩罕用心
誰說倉曹任窖穀近來家富屢千金

其八

先生高寄此林泉懶拙方知此樂全足屨兩忘便不借
人琴俱隱付無絃雲歸書帙留殘潤日上香盤裊細烟

勘破世紛無一事又拈枯筆續前編

其九

不仙不釋不居官久狎漁樵作往還
細雨飽眠一黃犢
白雲秀拔幾青山浮生往事真成夢
舉世誰人最得閒
惆悵伏波麓意氣暮年猶向五溪蠻

其十

生平繆計百無成
衰白如期入鏡明
鳥不驚猜無忤物
人多怒罵漸逃名
襟懷落落憐孤影
歲月悠悠過半生

老去自知無處用，只留雙眼待昇平。

春晚即事二首

紛泊楊花逐晚風，杜鵑聲徹故園東。
百千種事孤愁外，四十餘年一笑中。
血作公文緣分定，膊成山字坐詩窮。
少時懷抱今寥落，惆悵西窻夕照紅。

又

匆匆塵裏換時光，春去蠶緣底事忙。
鳩已居巢晴逐婦，蜂方出穴暖分王。
唱畊農起催秧綠，打供僧來趁麥黃。

今歲先生貧到骨時時爲米糶官倉

妾薄命

薄命佳人玉絕瑕不隨緣分落民家悲風古塚生青草
落日深宮唱白花萬里思情餘踟躕一生舊恨付琵琶
雄蜂雌蝶難相並莫向春風怨歲華

雜興三首

自合林泉著散仙虎蛟在處卧山淵未秋已擬償新穀
計月先愁欠子錢冷眼慣看平地險薄情誰念死灰然

人生還有相逢處昨日淮陰召少年

又

漫向松邊倚瘦筇一生襟抱與誰同照人不老古今月
送客多情南北風才盡懸知詩作祟數奇莫與命爭窮
冶金百煉今無幾休向人前說事功

又

經秋春蕙歎時過歸卧南窻竹一坡世味甚輕貪慾少
交情稍重怨恩多羞從綠酒看霜劍悔把青燈誤雨簾

技癢未能忘習氣新詩寫罷更長歌

神仙

擾擾爭趨陌路塵好閒平地即蓬瀛青羊石化紫烟客
白鶴松成老樹精夾岸碧桃春水濶滿山落葉暮雲橫
神仙不用尋行迹只向漁樵混姓名

竹

當年知已晉參軍畫手分傳老可文碎影貼金初得月
寒梢聳翠欲干雲平生自是輕餘子一日那能無此君

解為南風却炎暑擬封清渭答殊勛

夜坐二首

人間無處避紅爐急掃風軒醉一壺
泉冷月涵沉水壁荷香雨跳走盤珠
神遊曾到清涼境幽討如橫綠野圖
醉髮醒鬆吟骨聳從人笑絕道詩癯

又

呼奴薙草火攻蚊與客高談到夜深
風辨雌雄分別想歲占壯北喜真心
塵生渴肺須狂飲寒聳詩肩更苦吟

秋色滿懷人不寐坐看落月與橫參

術者謂予清淡磁基不貧不富而有壽

誰甘清淡厭輕肥命薄那堪不值時
挿架簡編家四壁
蟠胸梗概鬢千絲狂圖入夢空騎鶴
壽相生芒欲鬪龜
莫訝時魚更多骨從來萬事有參差

看笋

丁寧莫採籜龍兒造物成材各有時
寸碧縱橫牛戴角
一斑纏裏豹留皮長身上水夜深看
直幹干雲歲晚知

名節爲君描畫盡清吟堪繼萊猗詩

初秋雜興三首

利欲驅人看罷休人間歲月不停留別愁萬里滄江水
歸夢五更黃葉秋貯腹謾誇李書簾爛腸難擬董糟丘
老懷抑塞無人會徙倚西風百尺樓

又

守困書帷滯土牛誰揮尺箠浴寒流舊人不了新人事
今日那知明日愁一雁驚飛湘水浦孤蟾空掛岳陽樓

江南總解單于曲吹徹殘梅故國秋

又

田怕秋陽老怕貧誰能骯髒拔風塵窮年兀坐少生計
末路相逢無故人自愛漂搖棲倦翼誰分浩蕩慰窮鱗
區區溫飽何須較莫負秋來風月身

有懷洪復翁入郡城納金課

故人東下濯滄浪見說金沙作斗量昔想萬錢還跨鶴
晚知六博亦亡羊詩傳劍閣烟霞藁地入桐廬雲水鄉

瀟灑滿懷無處着歸程何況接新涼

雜興三首

老去時光漸不禁那堪風景入秋深文章何啻建安骨
議論能無元祐心舊日交遊誰可托中年憂患苦相尋
致身稷契非輕許末路無成學苦吟

又

做事英雄竟不成飛鴻何處避弓矰杲卿有舌罵阿榮
叔夜無頭傳廣陵禍福難知隨命值才名太盛取天憎

江流渺渺無回勢，獨向西風倚瘦藤。

又

窮守空山兩鬢蓬，老饕有分過年豐。
珠璣推上稻花水，金鐵馱殘梧葉風。
興寄小窗詩卷裏，夢回別墅笛聲中。
俗緣相逐何時了，一笑人間萬慮空。

社日思家

曉鼓鼕鼕露未收，老翁雞彘祀甌篝。
家家酒綠枌榆社，處處霜紅柿栗秋。
笑別比鄰包祭肉，醉呼童稚認歸牛。

一年兩度村田樂不羨人間萬戶侯


晚秋

蕭蕭兩鬢竟蒼然
況近重陽風雨天
欲暝江村烟四起
漸寒山館客孤眠
葉題舊恨在何處
菊折寒香仍去年
為憶故人三歎息
東籬沽酒已無錢

菊

矯首春風獨後時
冰霜自厲占東籬
悲如屈子淒涼意
清似陶翁平澹詩
寂寞秋香憐向晚
徘徊寒蝶笑生遲

蹇予氣味差相似采采金英盡一卮



富山遺稿卷七

欽定四庫全書

集部

富山遺稿卷

八至

詳校官庶吉士_臣李如筠

主事_臣呂雲棟覆勘

總校官檢討_臣何思鈞

校對官中書_臣張燾

謄錄監生_臣黃佑

欽定四庫全書

富山遺稿卷八

宋 方夔 撰

七言律詩

雜興四首

其一

我亦山林澹蕩人
籠禽飲啄失天真
客求妙墨多辭病
兒欠寒衣屢訴貧
夜雨書檠翻汗竹
秋風野飯配絲蓴

文章固是平生志贏得蕭蕭兩鬢塵

其二

江上千峯缺復遮疎林點點噪歸鴉短篷細網船回浦
快馬青衫客到家酒味春風生竹葉笛愁寒月老梅花
丈夫處世便疎豁莫買虛名鬪角蝸

其三

滿目風埃落日低拳支醉頰面山西平堤樹密欲藏寺
古渡舟橫不碍溪渺渺幾竿秋水淨啞啞三匝夜鳥啼

老來獨有詩情在口占新晴付小溪

其四

又是山邨秋暮天蹉跎身世惜流年風鳴淺瀨高還下
山碍浮雲斷復連豪氣尚餘孤劍裏矍眊合老短檠邊
心期蟠屈憑誰說盡是巾箱千萬編

續遣瘡鬼

老天難料倏炎凉水帝遊魂未伏藏子喜朋儔饜口腹
我愁冰炭置肝腸力持正論明無鬼醉讀離騷祓不祥

惟有五窮推不去主人改事屏車檣

江村晚望

江上孤村日欲斜秋光淡淡渺天涯幾多田舍隱林薄
三兩漁舟出荻花歸路負樵勞息樹亂流浴馬怒歎沙
憑誰剪出機中素圖入人間富貴家

春雪

蒼蘆林中忍辱仙春來戲作散花天曉山寒勁雲迷色
夜帳光生月鬪妍北海無書紙不乳朝陽有路馬難前

從知造物憎賢達擁絮高吟更自憐

雨霽二首

次第尋春不恨遲春光偏在雨晴時
風林竅暖山飛鳥潭洞門開驚卧蜻
酒冽萬家供笑語土牛千耦樂耘耔
物華又逐年華轉惟有詩人老更哀

又

誰傳春漲沒溪毛又喜朝晴暖土膏
箬裏旋生新接樹花窠重發舊栽桃
掃蜂上篲經營早通燕歸簾結構牢

莫道山中勲業少等閒善類入鈞陶

次韻胡柳塘夏自然春遊

邂逅相逢玷俊遊共臨清泚看橫舟
野情瀟洒便僧寺塵事囂煩遠市樓
倚杖有詩追和韻折花隨酒記行籌
歸來散步斜陽下休笑浮雲等幻漚

春日言懷

睡覺東窻味正濃鶯聲破曉入簾櫳
社前處處石泉水春半時時花信風
交友如雲翻手散浮華是夢轉頭空

癡兒不識愁滋味笑折花枝滿把紅

大水

長時烟雨弄梅黃身似枯株守破窻雲氣冒山天失畫
水聲撼屋浪翻江田通小澗頻障土船上高原屢徙樁
舉世滔滔何日息笑傾牀下古罌缸

雜興四首

其一

由來勢退不英雄誰怨天公苦不公蟲臂鼠肝俱造化

草妖木怪盡神通百年身世浮漚裏大地山河曠劫中
巧拙賢愚俱莫問此生元只似虛空

其二

老骨搓牙不入時可看霜雪點鬚眉短披樵褐形如鶴
長把農書手欲龜飢飽生前皆有定文章死後竟何裨
憑高欲說無人會早暮南窻盼綠猗

其三

冷看風濤起怒鵬自慚無力逐飛騰林泉襟韻清如水

儒素門墻淡似僧涼與竹奴分半榻夜將書嬾伴孤燈
人生適意祇如許玉署金門不用登

其四

六月猶披紫綺裘酸醎世味不相投清泉遶屋聲聲冷
高竹依簷葉葉秋揮汗讀書如有慕撚髭安字更何求
向無二事消閒日誰遣先生一段愁

其五

甘死蓬窻笑我癡興來况值夜涼時閒中不覺年華促

歸去方知宦路危
酒甕沉沉傾玉瀝
簞筠細細感風漪
月殘夢醒詩初就
枯筆長拋網蟾絲

蓮花

水仙微步碧瓊家
在湘湖西復西
清欲濯纓長在水
妙曾斲鼻不汚泥
已知淨社曾參問
合是濂溪善品題
欲採遠香無覓處
拏舟驚起兩鳧鷖

府城別任惠叔表兄

乘興來爲兩月留
廿年蹤跡歎萍浮
銜杯清話燈前雨

對榻羈魂枕上秋倦矣悲鳴雙客鳥歸歟浩蕩一漁舟
吟邊若值孤飛雁頻寄新詩慰別愁

雪

北帝宮中億萬姝天花散盡滿天衢
蓬山宮闕白禽獸
秦地山河銀雁鳧寒聳吟肩呵滴硯
春回醉頰宴開爐
梅花半樹南枝早夢遶孤山訪老逋

王古樵觀予苦瘡鄙句遂自賦眉遭二韻各二首
因次其韻爲戲

老去瘡殘擬灸眉暫憑酒力引風危久疎朋友慙多病
薄買田園費學醫吟罷肩寒生軫粟坐來形槁似枯梨
浮生自笑多磨障畫癖書癡發舊痕

又

吾哀端不爲蛾眉不假霜鉛補漏卮無恙感君頻寄語
不龜媿我未逢醫命窮漸退星臨木書悞無憑病發梨
康濟自身猶未辨敢將蘇息問民瘼

又

無端店疥適相遭空苦無成似嚼螯癩痕着身猶刻畫
垢腥滿爪費爬搔行吟謾想歌愁絕坐食空慚飽老饕
偶見新詩還技癢寒窻細字認牛毛

又

命災况復與窮遭真似蟊螟縛兩螯鱗甲稜稜便淨浴
髮鬚種種快頻搔甕頭釀酒何妨醉松下餐肪不厭饕
快罵田家剗肉句夜闌禿盡管城毛

田家

金史四庫全書
卷八
近來不復應差科生計無成奈老何
漆種十年雖恨晚
牛生百犢未嫌多
春耕着我扶犁手
社飲還渠擊壤歌
聞道溪頭新長水
偷閒試着舊漁蓑

又

數間茅屋占林塘
二頃田園幸未荒
蒿葉正長蠶卧起
鶯聲漸老麥青黃
壁間龍骨流泉活
筐載豚蹄白酒香
春事年年間過去
欲將擁腫問庚桑

秋晚雜興時寓府城

暫憑高處豁雙明，獨上譙樓倚晚晴。
烟岫齊紈千萬疊，落梅羌管兩三聲。
秋風世路客淒楚，流水年光獨老成。
吟興未如歸興切，蕭蕭落葉滿山城。

題洪復翁詩卷後二首

袖中光燄照崖垠，詩律雄渾遠有源。
近藁自成新句法，束書不叛舊遊門。
折芳梅下人雙屨，話別沙頭酒一罇。
健筆世間誰措手，老夫先擬舉降幡。

又

詩裏人傳大小賢自憐同業不同年白雲孺子詩千首
黃石老人書一編冷眼危途風竹亂知心舊事雪松堅
別愁去作星橋夢長傍河西牛斗邊

復翁近
館星橋

春晚雜興四首

其一

未妨行樂少年場倚徙東風醉一觴芳樹染成啼血艷
落花流出漲痕香陰陰春色和天老脉脉愁情共水長
坐閱流年能幾見菱花應笑鬢邊霜

其二

懶向風軒掃落花暮年情態惜韶華
春盤脆響供雷笋夜焙芳蘚摘露芽
蠶老住眠催作繭燕來新乳賀成家
狂遊無復少年夢聊遣清吟送日斜

其三

花神衣補去青宮紫陣紅圍一
夜空華髮龍鍾寒食酒青蕪狼藉
落花風雨聲點滴春愁裏世態侵
尋客路中我欲憑高寄蕭散暫舒
老眼數歸鴻

其四

欲逐芳菲寄病身
鶯花不管老年人
幽尋但見肥牛地
勝賞難追駿馬塵
薄酒似餽聊取醉
青梅如豆正嘗新
清歡未足還休去
日落汀洲又暮春

挽尚書先生

前代衣冠第一人
老來鳴道振遺音
勲庸臣子平生志
書易聖賢千古心
士願執經來鹿洞
客求挾冊售鷄林
飛仙雖去斯文在
山閣神光照斗參

食菜

日食何曾費萬錢
畦丁辛苦劬風烟
牆陰吠狗硬如鐵
山下蹲鷓大似拳
忍棄毛錐飛食肉
空憐匿服卧餐氈
茶甌氣味堪相配
更汲源頭活水煎

梅後久雨

自入梅天氣力微
不堪暑濕互蒸炊
鬢邊衰白三千丈
雨後昏黃十二時
積潤圖書供火焙
新栽羅褐覆香匝
小占定有朝晴喜
忽聽黃鶯語柳枝

田家雜興三首

其一

樵路通村暗蒺藜
數椽茅莖護疎籬
陰陰清樾風生樹
拍拍蒼鵝水滿陂
記日旋鋤燒地粟
上時新賣落車絲
晚晴慙愧逢端午
醉卧黃昏自不知

其二

兩兩蒼髯笑杖藜
舊裙兒女隔芭籬
斜陽鴉噪燒錢社
細雨牛眠放牧陂
酒熟十千沽玉瀝
麪香三丈捲銀絲

客來偶及興亡事說與衰翁也自知

其三

不嫌飮豆與蒸藜飽脫衣衫掛竹籬問酒亭前旗影市
繫船屋角藕花陂踏車掛壁閒龍骨生藥當庭蔓兔絲
我自耦耕非避世姓名休使外人知

四時宮詞

其一

陽和不解徧深宮黯黯春愁佇立中歲給買花藏筍篋

夕香拜月散簾櫳
鏤金巧勝勻如剪
縐縠中單薄似空
一曲紫簫吹徹後
薔薇幾度老春風

其二

披香簾捲幾斜暉
別殿承恩似覺稀
風蕩影搖陰欲轉
露蟬聲徹暑猶微
肉痕淺印丹砂血
手跡新栽白紵衣
例賜扇紈長棄却
雙雙羞看綵鸞飛

其三

七夕閒登乞巧樓
屬車隱隱認宸遊
幾行宮樹女牆月

一闌庭花御苑秋戲展花牋圖蚊蝶強拈綵綫候牽牛
輓轡聲斷屏山冷一夜寒蛩替說愁

其四

手撚梅花暗斷魂十年柘館未承恩曾催奏曲臨粧閣
暫出行香到寢園月照金鋪關末夜雪浮銀磔耿黃昏
并州剪就釵梁燕又逐年華作上元

避暑夜坐

一跌風波困敗鱗年來是事不如人醉吹羌管驚棲鳥

閒倚胡牀閣病身安得旃檀除熱惱自將紈扇障風塵
新涼漸近渺雲水分席鷗羣占白蘋

又

北窻幽絕夢初圓一葉秋聲醒客眠雌霓半空收暮雨
杜鵑六月熟高田稻陂別注魚池水石洞分承茗鼎泉
聊借舊書棲舊隱夜涼新入短檠邊

遊南山天寧寺

客裏塵駢未着鞭短篷送我訪幽禪橫空雲冒臨江寺

夾岸山隨下瀨船
謾借一觴追勝概
暫分半日洗塵緣
城頭梅角聲孤起
掉首空歸又晚天

送客出城

逐逐區中未了緣
此生飄泊是年年
片時枕上思歸夢
萬里江頭送別船
寒角吹殘低戍火
暮鴉衝斷遠村烟
我行在處成詩話
點化塵凡即是仙

過耜巖先師墓

取數多時物所嫌
有才無命恨難全
縱橫雖掃三千字

富貴纔終五十年幸有菟裘棲舊隱愧無雞絮酌新阡
茫茫大塊誰能料狐老成精鼠化仙

即事

紛紛寵辱幾時休朝上青雲暮作囚能可將軍宿亭下
不堪廷尉望山頭浮雲過眼難搏控世事冥心任去留
湮亦不緇磨不磷至今遺教首軻邱

送人赴學官二首

生平講貫爲知幾世好從渠與我違天下無如書益智

人生惟有仕當歸青燈夜雨蟲魚註碧水西風鱸膾肥
莫道尺前難寸退古來富貴觸危機

又

清時巖穴下弓旌儒館翹才盡至公詩記行程囊古錦
劍裝新飾鞞花驄莫因貴宦負遠志當爲飢民念鞠躬
欲問故人在何處舊山桂樹正叢叢

初夏雜興四首

其一

肥梅貼暈麥搖芒四月山居取次涼古砌月鋪銅沓冒
寒松風撼鐵琅當兒孫猶有將軍臭廝役空知太尉香
有客縱談當世事薜蘿深處更移牀

其二

天氣如秋意轉闌高樓簟枕帶餘寒棟花零落魚初發
梅子青黃雨不乾客怕遠行催早宿農逢小熟勸加餐
近來悍吏經過少更喜深山好長官

其三

作計吟詩逐故貧，欺人鬼子轉情親。
案頭日飲三升墨，鐺底時空五合陳。
燒麥旋教供野飯，貫楊準擬買溪鱗。
蘇君端爲無田出，近日田多更累人。

其四

雨打梅頭麥半枯，出門步步困泥塗。
世情何但惡溪惡，野性聊同愚谷愚。
兒可讀書供日課，婦如有酒待時須。
興來方試吟詩筆，西舍催錢吏索租。

重午二首

金史卷八
卷八
畫鶴鳴鼉水滿湖千年遺恨渺平蕪累臣水底沉魚塚
玉女釵頭綴虎符雙鬢點斑羞綠艾一樽凝碧怯香蒲
楚鄉舊俗生悽愴愧殺人間懦丈夫

又

苦瘡戰馬倦風沙伏櫪無心萬里賒老去手風從婦展
愁來背癢倩兒爬人情反覆好生羽世味差殊嗜食痴
一卷方書初讀罷小窻驚怪日西斜

觀物

靜中羣動互飛奔擾擾誰能脫世塵
蠅虎案頭新得雋
螿娘枝上忽忘身平生攻苦味無味
舉世爭雄入食人
安得洗心無一物碧波鷗鳥自相親

仁甫次弟余韻

造物兒戲多猜嫌百年醜好兩能全
眠牛纔封一杯土
鶴歸已怪三千年樂天求歎北邙冢
后山慟哭南陽阡
從來賢達總如此誰能羽化隨飛仙

秋興二首

水花風葉亂蕭蕭涼入秋衣怯寂寥桑落寒香初出市
蓼花新漲欲平橋半蓬烟雨漁家傲匹馬關山客路遙
拍手西風無一事未妨橫笛向耕樵

又

不堪老病縛閒身面目崢嶸歲月新半世界無如意事
五年慣作在家貧悠悠懷抱希知我詡詡交遊喜負人
俯仰世情都勘破西風獨立岸綸巾

夜坐

全家久住白雲窩
貪看疎梅夜景多
簾角花陰和月捲
墨池水凍帶冰磨
寒欺駝褐吟肩聳
暖入鵝黃醉面酡
笑挹暗香人不寐
不辭百匝繞前坡

寄何稼隱

欲出孤雲意已闌
東風吹夢落東安
燈前鄉國千山隔
窻外乾坤一面寬
放馬脫韁嘶曉岸
連樯牽索上晴灘
闌干倚遍空相憶
花落芳洲春半殘

沃祥卿和前韻見寄再和答之

西轉東移客興闌風枝驚鵲不曾安孤吟愧我詩筒澁
百罰憐君酒令寬西閣梅林迷雨浦畫橋松韻接寒灘
相思一夜知何處夢醒樓頭鐘欲殘

次韻徐子聲采桑

喚起飛來說曉晴先生無處問歸津轉頭歲月如流水
滿眼交遊少故人榭葉老樵擔玉束菜花飛蝶護香塵
隔溪綠暗歌聲杳點點青山入夢頻

送春

春從此去不躊躇
渺渺寒波接碧蕪
想逐風帆歸閬苑
又傳雲馭赴遮須
此生歲月隨泡影
末路功名等雉盧
歸向西窻聽幽弄
一樽濁酒對提壺

憶復翁

垂楊渡口小舟橫
我涉清溪君獨行
未許馬羣空冀北
自憐墨派過彭城
鱗鴻乏便書難到
蝴蝶無情夢不成
可是孤吟清絕處
高山誰識斷腸聲

溪上

富山遺稿卷八
古木陰陰溪上村
隔溪呼喚隔溪應
柳邊漁艇水雙港
山崦人家雲半層
早麥熟隨芥菜餉
晚茶香和樹芽蒸
自慚未得亢桑樂
癡坐寒窻似凍蠅

富山遺稿卷八

欽定四庫全書

富山遺稿卷九

宋 方夔 撰

七言律詩

雜興

溪上寒窻面綠漪，孤蹤漂泊渺天涯。
愁聽火令拋長檠，醉折花籌記小詩。
鶯語難尋春去處，鄉心偏等夢回時。
文章滿腹知何用，落得奔波兩鬢絲。

重午

楚鄉節物又今朝
老大催人不肯饒
歲久菖花初見面
病多艾葉已盈腰
浪濤何處尋沉魄
菰黍無心逐畫橈
莫到獨醒空過了
旗亭風急又相招

次韻稼隱上徐雲岫喜復貢舉

天闕誰推破
早雷蟻封鼠壤
一時開雲飛遠岫
無心出
春逐行人有脚來
桂窟舊遊空
雨露棘闈前
度沒蒿萊
短衣儻逐前麾去
解向淮頭破賊回

沃祥卿次前韻見寄和以答之

羨君古洗刻雲雷苞裏珍竒秘不開
亭枕寒流隨浪動樓橫空翠約雲來
吟箋題滿投囊賀壽罈光浮戲綵萊
欲洗炎埃無處所玉梅泉下日千回

次韻通甫喜復貢舉

當年塗抹笑東施羣動僂僂各自飛
不分前程移岸谷至今遺恨滿庭闈
文章老去攻詩律富貴年來發禍機
世上英雄君與操誰甘終老故山歸

秋興

笑呼筇竹過溪東
撼撼秋聲到井桐
落日遠山疑有雨
孤村古樹欲攢空
貪嘶馬飽銜花草
趣食魚肥墮水蟲
歸對書檠人不寐
鄉愁怕入夢魂中

木犀

下土花中第一流
移根自笑此生浮
獨依上界清虛府
滿貯青冥沈瀟秋
稜葉風翻低散亂
蒼皮蟲蝕老雕鏤
醉來徑向高寒處
自駕青鸞擁玉虬

又

蒼蒼珠樹俯寒流
析木津頭戲拍浮
褐鳳搏風朝紫極
硯蟾滴露寫清秋
返魂香倩羅裳貯
碍月枝憑玉斧鏤
夜景未闌清入骨
蕭蕭鱗甲卧癡虬

又

綠衣年少正風流
手折高枝喜氣浮
三樹獨標仙窟種
四花分占玉壺秋
濃薰藥杵長春搗
清逼詩肝巧斲鏤
世上紅兒那可比
試將此句問羅虬

食西瓜

恨無纖手削駝峯醉嚼寒瓜一百笥半額花衫粘唾碧
一痕丹血搯膚紅香浮笑語牙生水涼入衣襟骨有風
從此安心師老圃青門何處問窮通

景德觀陳道士圃多菊覓其種栽並寄以詩

愛藥仙人醉不歸秋光次第入玄都蝶隨露藹移花塢
風逼寒香落酒壺老去君方空結習興來我欲劬荒蕪
和篇應與花俱到換得驪龍百斛珠

送吳友直過吳門省親

海濶天南不盡頭，雁來豈爲稻梁謀。
飄零骨肉憐杯酒，老病形骸戀破裘。
時有足疾日暮片雲勞望眼，天寒孤棹發
行舟。十年冷落江鄉夢，願借西風過橘州。

次韻雪岡徐景星二首

阿咸秀出竹林邊，千古風流有此賢。
獨向詩盟參古律，不隨世態異憎憐。
夜光照耀需他日，汗血奔騰出少年。
乞我飛霞與青玉，夜深環珮韻璆然。

又

窮腹便便說老邊
敢將文字厭前賢
愁懷不作功名想
衰鬢從教兒女憐
客路知心惟有月
書燈話舊更何年
欲投名字來吟社
已濕寒灰不復然

今歲吾鄉頗稔而收成值雨夜坐有懷二首

千步平場築杵齊
西風墟落轉淒迷
要教歲計收霜稻
不分時長弄雨粃

訪以細雨爲雨
粃猶言雨毛也

曩祝汙邪酬願望
近

居畏壘費推擠
先生莫戀無錢飯
定把長鏡理舊畦

又

蕭蕭疎雨未調霜空向寒堦滴夜長風激木圍如撼枕
蟲號土穴欲扶牀蟻傾清濁香浮甕蠅劈尖圓黃戴筐
獨背殘燈眠未穩夢尋歸路到枌鄉

次韻陳道士和徐星韻見寄

寄跡琳宮絳闕邊聚星家世楚先賢但留法界寸田在
不要窮途衆目憐談客由來無負郭詩盟此去定忘年
吾衰有分非君獨休羨千金有計然

又

不將書劍奮窮邊
藥裏君臣酒聖賢
笑我文章全乏用
從渠心目兩相憐
叅同顛倒長生訣
大衍推尋過去年
莫把詩狂壓師服
興來還解賦超然

次韻沃祥卿見謝

屢緣倦翼發虛彈
拋擲明珠不憚難
但見雲烟歸筆下
不知風雨做秋闌
枌鄉人在依餘熱
桑落春濃壓早寒
時鼓梅花無譜曲
坐中驚倒董庭蘭

又

有道論心知已少世情開口向人難滴愁細雨驚秋暮
照睡青燈伴夜闌文席知君容孔暖孤吟愧我勝郊寒
浮花浪蕊何須數歲晚歸來看石蘭

遊碧沼寺

即晉郭文舉舊隱

古寺蕭蕭晝閉房我來無處覓春陽門前綠靜江湖汎
松下清陰暑月涼空寄郭公留舊隱愁聽望帝斷離腸
借君拍板都無用看盡伶優老戲場

接花

枝頭信手奪春工要借并州一割功
瓜柳皮粘混金碧梅桃根換變鉛紅
笑談自分求孫叔形似應難想孟公
却怪后皇同種橘過淮便隔馬牛風

清明遊塔山

海山鬣骨白如銀况是青山溟濛君
不見黃泉沾紀釀但驚紅雨落劉墳
百年塵土鎖連骨一幅功名碑刻文
欲返斷魂呼不醒歸塗賓從醉紛紛

清明後一日

老年光景轉風輪惆悵清明又一春
飛燕雙雙新舊恨長亭五五往來人
揩磨病眼朱成碧補接新花假像真
要覓西江千斛水拂衣徑去洗淄塵

遊苦竹徐墳值雨

數聲呼我竹溪鷓烟雨蒼茫苦竹岡
半徑暮山浮翠滑一渠春水落紅香
無人羞乞墦間肉有酒空澆地下郎
萬化盡時終閉骨醉來誰復竿彭殤

次韻通甫至日

先生熨眼洗浮埃，共看梅邊節物來。
破悶好詩勝搔背，澆寒新酒似淋灰。
賓主風裁推勝閣，弟子聲名詠有臺。
憐我歲華相逐老，應將暖律發枯荄。

別通甫

歸途渺渺迫年華，回馬如飛不用撾。
遙指荒村沽竹葉，獨行殘月看梅花。
不嫌問路征夫冷，頗訝迎門穉子譁。
爲報江邊羈客道，投林莫作後棲鴉。

春歸雜興三首

白首青燈滯一鄉，不將遲暮照韶光。
經風魏紫埋傾國，破曉離黃殞折楊。
老去功名隨夢斷，別來雲水隔天長。
此生聚散何時了，定計歸鋤五畝荒。

又

雙丸不肯駐顏光，宇宙悠悠萬物長。
寂寞饑春風雨裏，笑歌賭命綺羅鄉。
破衾自卧三椽月，枯硯猶耕萬卷莊。
未脫書生窮口債，向人時復說文章。

又

東皇歌闋祖青宮借我鋒旗併送窮
繭栗潤含萌竹露
槍旗香過焙茶風
花殘來歲須重發
日卻何時定再中
惆悵浮蹤底處所
夢隨飛絮故園東

賀山房先生得孫

晚節歸來綠野堂
傳家衣鉢付諸郎
喜存千載古壘洗
初聽九苞雛鳳凰
春蚤桐枝新濯秀
日長棣萼騰流芳
公家好事聯翩在
首寄詩篇寫弄璋

次韻沃梅泉見寄詠稼隱相過之樂併督作詩

星聚何曾奏少微
浮萍桂海偶相隨
摻袂東閣吟梅處
眇目寒窻點易時
自嘆兩翁餘口業
懸知千載有心期
啼猿唳鶴初無事
怕有行人怪說詩

又

梅壓滄浪密復疎
臨流幾度濯綈絢
侯封富貴歸千首
身計行裝挂一壺
文飲暫教吾輩共
騷壇誰道我軍孤
沔亭洗盡箏琵琶
耳重理絲桐絙老梧

次對稼隱病後見寄

自憐數米續晨炊，飢火空時萬想虛。
富貴由來如夢鹿，江湖是處可羹魚。
風輪歲月催人老，水鏡襟懷與世殊。
書信柴胡俱不到，空慚多病馬相如。

苦熱五首

其一

夏來樊圃隔陰晴，誰與天工管不平。
一窟蛟龍時作怪，千年草木偶成精。
政疑沙界熬焦釜，未倒銀河洗太清。

誰是蒼生霖雨手
普將禹甸釀西成

其二

絳節彤幢禦火精
世間那是水晶城
醉橫蘄竹愁重醒
睡落齊紈惜屢驚
家口飛蚊兒女語
鄉心過雁弟兄情
更闌誰撼千章木
悞作連牀夜雨聲

其三

午醉醒來濯碧泉
水亭况是晚涼天
橫眠蓮葉半晞髮
靜對楊枝雙袒肩
蹇螻聲乾林更靜
碧梧陰轉月初圓

茶甌更試纖纖手不仗清風送玉川

其四

六龍無計駐雙丸壯志摧頽似倒瀾萬里不成遊客夢
半生祇辦腐儒餐誰憐打草哀麻答不羨畫松楊契丹
世上紛紛誇禿髮到頭那肯着南冠

其五

六月紅雲不肯移清心自合勝炎曦雲根斲藥移松骨
石罅分泉插木皮未用冰蠶來海嶠坐看凍蟻走蛾眉

人間寒暑相催迫待寄東溪萬縷絲

桂花

服食生平屑辟邪死埋金粟或金沙忽驚秋骨開成雪
誰遣香魂化作花雲外孤芳吟舞鷺月中半影匿妖慕
先生幽佩乘風去獨向仙堂看織紗

夜坐月下

殘雲點點四飛揚萬里離人共此光誰鑄水銀懸絳闕
獨留姹女搗玄霜窟中蟾兔雙灰劫影底山河幾戰場

欲駐頽暉無意計何人樓角韻伊涼

讀赤壁賦

萬舸浮江互蕩磨一番蛟鱔戰盤渦中天日月悲分影
對局英雄付逝波形勝空傳二赤壁文章誰肯百東坡
荊州風景今何似秋夜時聞窈窕歌

雜興

衰草含烟木葉黃空城搖落客思鄉雁高孤月臨空塞
魚退殘星過曲梁醉眼昏花迷野馬帖書戲草掣風檣

閒來更試絲綸手新釣江鱸一尺長

晚眺二首

依稀風景小羌村不欠東屯稻菽園阿魏搗香風送響
雕胡擘玉水開痕招邀紫翠山當座標掇紅黃菊上盆
世上去來俱是客隨風吹送夢歸魂

又

隔江斗入白雲村分我閒雲伴綺園月鵲自驚翻舞影
露蟲相弔洗啼痕窮通蝮玉橫書案得失梟盧轉采盆

可惜牀頭枕客道蕭蕭奔馬醒吟魂

次韻王蒙泉見寄併和鄙作

夜雨連床憶舊時鱗鴻難寄故人詩
憐君不察抱心久
寫我何如問信遲
兩地雲萍無定跡
一庭風月不分岐
寸衣換得天吳錦
豈是騷盟一字師

菊花

不入萎紅爛紫場
蕭然清苦凜風霜
客中衰鬢隨秋老
籬下寒枝似舊香
千載有陶期汗漫
幾人後屈詒淒涼

每愁搖落知誰在只有黃花守死黃

寄何稼隱

憶昔相逢霜露寒再三與我返鄉關
溪行散亂飛蓬鬢旅泊淒涼落日顏
活計獨傳鴻寶苑清遊重上鹿門山
崇朝觸石需滂沛笑我閒雲苦未閒

偶作

結緣無成謾學書倦飛猶自揀庭梧
不離文字添衰髻已外聲名謝壯圖
伯畧莫教累思澤儒詩何事汗裙襦

從今便覺高擡眼不要奄奄學志螭

次韻沃梅泉見寄併見和鄙韻

謾道萍踪日夜浮自慚遲鈍戀菟裘
聖傳杯裏蘭亭帖婢熟山中笠澤秋
有信付將來去燕無心寄與沒浮鷗

時稼隱
解盟

去年曾記梅花下細雨離魂阻勝遊

又

散仙自在步如飛絡腦黃金不受羈
籬菊清香須把酒京塵紅漲不緇衣
倚樓看劍浮名逼閉戶尋詩過客稀

水擊槍榆俱有得不妨着我子陵磯

至日

九地窮陰逆稗陽萬家起早拜迎長梅將暖信迎青帝
橘子真心服后皇耳藥肯塗銀盒雪牙硝自踏板橋霜
詩情只會如工部至日年年客異鄉

和府尹虛谷先生和徐子英韻併寄徐子英

千峯蒼翠擁城樓着我宗英七里洲昔日松楸相伴住
暮年湖海未歸休詠詩遙認窮司馬騎竹爭迎舊細侯

莫爲梅花長挽却好將繩削訂由求

漢賢良墓在雒山東郭先生嘗賦石

峽記

其事

又

袖手闌干獨倚樓暫舒倦眼對滄洲雲山勸我閒方住
聲利縈人懶即休後世豈無青史筆浮生那欠赤泉侯
巖幽得似銅駝陌粟飯藜羹却易求

富山遺稿卷九

欽定四庫全書

富山遺稿卷十

宋 方夔 撰

七言絕句

兵革後初出邑郭

無數青山對坐衙讀書林下靜無譁如今風景那須說

坊郭無民吏數家

陳剛定作讀書林

錢王守鳧墩在臨安道左

山下燈籠掛紙錢水楊墩上草芊綿
高人不要金丸用買得三吳八十年

紅梅

霜月娟娟午夜寒酒酣來此凭闌干
滿枝艷色驚愁眼宣主當年唾未乾

世言有問脩短之數於希夷者曰
好來好去因觀落葉有感前語

芳菲桃李雨新肥緋綠園林露已淒
自道好來還好去

到頭總是泥塵泥

震澤市

石峯疊疊小橋西
昔日人家桃李蹊
無限歡娛俱寂寞
珠璣鋒鏑逐春犁

夜坐評史

史記

遷史馳驅縱復橫
不煩繩削自天成
後來縱欲修良史
法度森嚴敢變更

西漢書

班固師遷亦步趨未容後進造庭隅半生描摸龍門像
雖乏精神貌却腴

東漢書

羨渠二子著先鞭未把文章許范傳遠出孟堅畦逕下
謾誇筆勢舞翩翩

順宗實錄

韓老文章不減遷中山一傳更增妍如何實錄二三卷

氣滿言卑不類前

五代史

自許精嚴獨有歐庸奴班馬法春秋文章雖到精神露
殆與二書爭一籌

客有善談謔者曰鰭鮎魚龜皆水族也一日聚議
謂河伯求職事鰭先去河伯授以右相鮎魚次之
授以左相龜行遲欲以翰林處之龜不願曰好官
二子俱做但願河伯註長壽看二子做到何處其

言雖謔可為發一笑也謾記其事

傭耕陳勝假為鬼爛斧王喬詐得仙若見淵明為我道
併從金母乞長年

富貴

懷清臺廢嬌娥怨醉白堂空過客愁若向此時回首看
生平富貴一齊休

讀劉阮事用元徽之韻

層層樓閣鎖嬌鬟要伴朝雲出遠山紫府神仙行世上

深宮妃媵落人間

商婦

揚子江頭水幾篙
匆匆思夢越波濤
征人無信西風起
落葉滿庭蟲夜號

戍婦

去歲辭家戍隴西
玉關消息渺天涯
深秋別恨向誰訴
掛壁空靴生網絲

夜讀劉夢得別夔州官吏詩遂賦一絕

死稱柳水柳侯廟老守揚州揚子津莫計當時同黨籍
一般詩句一般人

邑郭旅中

出獵將軍夜打圍劍頭吹火割鮮肥山林儘有逃生處
自是驚麕觸禍機

諸生多以船夫入監房

水程何日到瓜州謾說儒家冠九流已與官船充水手
更從廷尉望山頭

元日

鬼物從來著論無題門安用換桃符呼兒記日開書讀
為說濂溪太極圖

春行口占

楊柳青搖窮袴帶櫻桃紅滴守宮砂春風不解留詩髮
只解年年媚物華

甄夫人 楊貴妃

少臺賜姐憐玄髮馬驛誅褒死曲眉自古文章多觸罪

我當併按北征詩

張麗華

玉樹歌殘月上弓誰將白刃斬春風妄言若不懲高叟
斷案如何服太公

寒食上塚

我是卿家老寡妻哭卿墓下草淒淒紙錢亂挂澆殘酒
人去黃昏鴉正啼

田家

晌午鴉鴉響踏車那邊叢薄有人家老農歇熟藤陰下
一樹冬青落細花

九日

籬邊初未見黃花滿眼青山故國賒午醉醒來人正遠
悠悠落日獨思家

梅花五絕

其一

不識梅花不識詩空將色相較銖鎰美人立盡黃昏月

細看枝枯葉脫時

其二

一日微陽積一分
看看積得一陽成
夜來迸出梅花裏
天地初心只是生

其三

羅浮仙子月中歸
三疊誰歌絕妙辭
便是梅花難着筆
老逋只有七分詩

其四

風味酸寒冰齒牙誰知烟雨送詩家
刪前不是無題品
未有文章說到花

其五

白鶴峯頭着縞衣醉騎鶴去幾時歸
蠻詩數首傳誰相
寫出杭州玉雪妃

插柳

曾記來時割伏雌相思頭緒亂如絲
自憐春盡腰肢瘦
更向庭前插柳枝

秋花十詠

十里紅裙間綠衣西風吹亂碧參差佳人日暮秋裳薄
怕有天霜磬折時

右蓮花

仙府分根飽月光百車金粟撒瑤房夜來東壁西風勁
三萬牙籤字字香

右桂花

一串金鋪簇碧叢野田高下狀童童憑君洗我讀書眼

收入公門藥籠中

右旋覆花

似是根株食辣蟲知君苦梗老霜風功名莫道全無意
火氣騰騰浮面紅

右蓼花

風急從衡木葉飛寒花搖曳水中低褰裳不采空歸去
誰識江南季女飢

右蘋花

步馬西風冠切雲欲從九畹問秋芬自原未死香都變
老盡山人況識君

右蘭花

籬下花逢少酒錢何如潭上酌芳泉顏齡此去憑料理
四百添書甲子年

右菊花

河鼓無靈帝遣來野籬竹屋手親栽仙姑咳唾隨風去
染作琉璃八角杯

右牽牛花

露冷霜清日已淒淡粧素服滿前溪涉江一段荒涼意
弱國孤臣寒士妻

右芙蓉花

寒蘆颯颯響風沙直待秋來雁作家夜擘饑翎搏未起
一汀撩亂雪飛花

右蘆花

寄洪復翁

月色橫牕湧爛銀空房獨臥悄無鄰五更記夢渾無數
半是還家半故人

征人怨

辭家泊水幾番秋流浪天南海角頭此去千鴉三萬里
憑君馬上寄離愁

又

前年赴急合梁山一歲征行一歲還待到故鄉能幾月
明朝又出雁門關

續梅花七絕

其一

松下相逢雪雨乖
人生何必泥形骸
竹籬一醉休惆悵
只麼神交自是佳

其二

褪粉殘粧對鏡慵
楚踪秦跡恨匆匆
芳心不被春風折
誰揉香肌滿籍紅

其三

欲洗年年墮謫心
仙人空返白雲岑
飛花欲落頻回首
老去風情尚不禁

其四

寂寞幽香怎得知
醉來樹下酌冰肌
更須呼我碧花唾
聽唱新番一剪詞

其五

只在溪橋野屋邊
霜饕雪虐不能干
可人風韻元蕭散
莫道花仙骨相寒

其六

約束寒梅作主張
此花解事助淒涼
暗香月下薰詩骨
惟見吟來句句香

其七

屐痕印雪不粘塵
去采南枝璽粟春
待得杏桃蹊樹下
我家風味已生仁


別梅二首

葛仙溪上一株梅
我到家時花正開
後夜月明風露冷

橫枝休遣上牕來

又

風韻清高不受塵
冰為肌骨玉為神
一生謾記吳姬面
不是人間婉媚人



富山遺稿卷十